

05 FEB 2000

RUMAH TERBUKA MCA MERIAH

KUALA LUMPUR, 5 Feb (Bernama) -- Ratusan warga kota membanjiri perkarangan Wisma MCA di sini seawal pukul 8 pagi untuk menghadiri rumah terbuka anjuran MCA sempena sambutan Tahun Baru Cina hari ini.

Presiden parti Datuk Seri Dr Ling Liong Sik menyifatkan kemeriahan masyarakat merayakan kedatangan tahun naga emas itu sebagai tanda ekonomi negara yang semakin teguh.

"Kali ini saya rasa lebih banyak orang datang jikalau dibandingkan dengan tahun yang lepas dan saya percaya ini adalah satu petanda yang menunjukkan ekonomi negara telah pulih," katanya kepada pemberita ketika ditemui selepas majlis itu.

Ling yang juga Menteri Pengangkutan berkata kejayaan memulihkan semula ekonomi negara itu adalah hasil usaha erat kerajaan dengan rakyat, dan sewajarnya ia dinikmati bersama.

"Saya berharap di masa depan keadaan ini akan terus berlanjutan," katanya.

Antara pemimpin negara yang hadir ialah Perdana Menteri Datuk Seri Dr Mahathir Mohamad dan isteri Datin Seri Dr Siti Hasmah Mohd Ali, Menteri Kerja Raya dan presiden MIC Datuk Seri S. Samy Vellu dan Menteri Perusahaan Utama yang juga presiden parti Gerakan Datuk Seri Dr Lim Keng Yaik.

Turut kelihatan ialah tokoh veteran Umno iaitu Tun Ghafar Baba dan Tan Sri Ghazali Shafie serta bekas presiden MCA Datuk Lee Kim Sai.

-- BERNAMA

NM RHM